



A circular library stamp is located on the right side of the page, partially overlapping the title. It contains the text "BIBLIOTHECA" at the top and "MEDICA" at the bottom, with some illegible text in the center.

QUÆSTIO MEDICA,
QUODLIBETARIIS DISPUTATIONIBUS
MANE DISCUTIENDA
IN SCHOLIS MEDICORUM,

Die Jovis vigesimâ nonâ Octobris 1705.

M. JOANNE DE PINEY PESCHARD,
DOCTORE MEDICO,

PRÆSIDE.

An homo à Vermibus?

I.



ON minori fortè negotio intima generationis
arcana, & obscura principia, quam mundi to-
tius compagem, & creationis modum inveneris.
Philosophi ab omnibus retrò sæculis in eo se ar-
gumento exercuerunt. Ex semine & sanguine
menstruo hominem compingit Aristoteles, licet nec in con-
cubitu, nec protinùs à concubitu quidquam in utero reperia-
tur, quod vel à mare, vel à fœminâ, vel ab utroque profi-

A

ciscens, futuri fœtus exordium haberi possit. Eodem incommodo laborat sententia Medicorum, generationem ex seminum utriusque sexûs mixtione deducentium. Nodum solvere Sennertus aggressus est, sed nedùm expediret, implicuit. Voluit animam rationalem esse in semine virili præsentem, & cum illo in uterum transvehi, atque ex utroque semine conjuncto, non mixto, (*mixtio enim, inquit, est rerum diversarum*) animâque prædito, perfectum animal emergere. Docti microscopio adjuti, tot tenebras excutere conati sunt; sed videntur parùm fuisse felices. Capti jucundo spectaculo, & studio novitatis abrepti, arbitrati sunt veras esse conclusiones, quas præceps animus, præjudicatâ quadam opinione deceptus, tacirè suscepit. Cæteras vero, vel oculorum fallacias, vel promptioris in judicando mentis assertiones, vel mutuatas ab inexpertis narrationes esse existimant. Ad tentanda experimenta sapiùs se accingunt, animo non veritatis detegendæ cupido; sed suis opinionibus desponsato. Quidquid evenit, trahunt in rem suam. *Aliqua patamus nos aut videre, aut audire, inquit Galenus, aut omnino sensu percipere, quemadmodum in somniis, eò quod species objectorum, jam menti impressas contemplamur.* Propositi sui nimis tenaces, experimenta quærunt ut illud probent; atque ita à veris observationibus falsa deducunt, neque cum principio coherentia. Quæ vident in dubium revocant, de his quæ non vident hariolantur. Operationes naturæ suis cogitationibus accommodant, sed operationibus essent aptandæ cogitationes, atque ex illis deducendæ. Suam temeritatem sensuum fraudem appellant. Noli plus assentiri, quam ut tibi apparere persuadeas, & nulla deceptio erit.

II.

PLUS admirationis habent, quæ molis minimùm. Nunquam magis, quam in minimis tota est natura. Novus orbis microscopio detectus est. Animalcula, quæ fugiunt oculos, nec aciem ejus effugere potuerunt, iisdem, quibus grandiora, vivunt, & moventur instrumentis, liber ad intimam naturæ aditus apertus est. Datum est rimari corporis humani ignotos & latentes recessus. Liqueorum, quibus viger, texturam, & salium, qui ipsis insunt, figuras, atque in invicem

actiones, contemplari. Hinc plurimæ utilitates in Medicinam derivatæ. Hinc suggeruntur indicationes prudentibus, expressæ, vel ex eâ novâ corporis humani cognitione, vel analogismo probatæ ex brutis & plantis. Suggestuntur remedia, quorum vires confirmantur observatione eventus. Commoda multa ex ea simplici rerum contemplatione percipiuntur, quam nuda natura oculis attentis exhibet. Erroribus innumeris se implicat animus, ubi conjecturis illas metas prætergreditur.

In manibus quæ sunt, vix nos ea scire putandum est;

Usque adeò procul à nobis præsentia veri.

Quàm facile nobis illudunt, vel exquisitissimâ microscopia! Quâ ratione molem augmentobjecti, coni visorii basin nimium arctant, ut vix uno intuitu animalculi minimi exiguam partem oculo referant. Per vices, & successivè totum perlustrandum, quia integrum non potest repræsentari. Quin & varias formas non nativas induunt objecta pro lentium situ & mole. Maximè quoque diffunduntur colores in objecta, nec eos esse naturales judicare possumus. Jungantur, loco unius lentis ocularis utrimque convexæ, vitra duo plana convexa, ita ut in medio superficies convexæ sese tangant, curva objecta, aucta in immensum, se plana oculis offerunt. Sæpius quæ continua sunt, apparent divisa his interpolatis visionibus. Non etiam, ut res existunt, intuitu apparebunt, si pura crySTALLUS non sit ab omni maculâ, at reperire quæ nullo vitio laboret, tam ratione materiæ quam ratione formæ, difficillimum; si lentium superficies perfectè sphærica, & exactè lævigata non fuerit, si luce debitâ non utatur oculus (non rarò vividissimâ opus habet, aliquoties remissâ, & valdè temperatâ, modò directâ, modò laterali & reflexâ) si longius producat, aut nimis contrahatur objectum. Prout oculus ipse convexus, aut planus est, alienas à nativis species offert spectantibus. Hic in liquore, in quo subsidit piper, diversas animalium species, & variarum ætatum se deprehendisse testatur; Ille usus omni cautione & industriâ, nihil se vidisse simile confitetur. His difficultatibus implexi, vix objectorum notitiam assequi possumus, sæpius utrum existant, meritò dubitamus. Quomodò ex principiis, quorum nondum firma cognitio est, certæ elicerentur conclusiones & systemata?

A ij

LEEWENHOEKIUS sagax scrutator naturæ, feliciter rimatus microcosmi penetralia, non minùs se fore felicem in generationis hominis indagatione speravit. Opiniones aliorum de ovis & ovariis ut figmenta, fastidiosè respuit, *Quia præteritis temporibus*, inquit, *meliores circa generationem hypotheses excogitari non potuerunt.* Voluit testiculos mulierum, per quandam analogiam ad viros, ipsis concessos, esse partes otiosas & nulliùs usùs, ut mammæ sunt in hominibus, & cornua uteri ad ipsos non posse pertingere. Ratus se vermium myriadas in semine virili deprehendisse, tot hominum agmina statim esse affirmavit, quæ cum spermate in uteros infusa, quasi toridem seminum plantarum granula, terræ commissa, in benigno ejus sinu adolescunt. Statuit ipsorum parens, eos esse tantæ tenuitatis, ut plura decies centenis millibus istorum animalculorum, collecta simul, non accedant ad arenæ grani magnitudinem; plura ex illis, amissâ longâ caudâ, quâ instructa erant, instar vermiculorum, in utero figuram rotundam adipisci, cum quo tamen nullam potuit eorum connexionem, nec minima funis umbilicalis vestigia detegere, & quamvis singula plus millies majora fierent, quam cum primùm in uterum injecta sunt, centesimâ arenulæ parte adhuc fore minora. Ut quid ergò unus vulgò, duo tresve sed rariùs, ex tanto proventu, statis temporibus, lucis usurâ fruuntur? Ut illud incommodum declinaret scriptor, tam solers in conjiciendo, quam in investigandis arcanis naturæ perspicax, suspicionem injicit, vivas non esse tam parvas creaturas, seu potiùs multiplicem earum numerum è semine masculo, iisdem turgido, evolutarum. Quibus intelligere datur, unam aut alteram è communi naufragio incolumem evadere, cæteras, in utero arctè conclusas, mutuo sibi esse impedimento, & præfocari. Quibus arrisit Leuwenhoekii sententia in usum ova mulierum revocando, ingeniosè commenti sunt, illis inesse foramen, instructum valvulâ, quæ ingressum uni aut alteri animalculo permittat, neget regressum. Sic tollere conati sunt vitium, quo videbatur hæc opinio laborare, sed alia graviora ipsi hærentia non excusserunt.

IV.

SUSPICARI licet, novam Leeuwenhoekii doctrinam esse commentum, ingeniosum quidem, commentum tamen. fortè splendido errore nos microscopia ludunt. Subiectis illorum examini viscidis liquoribus, quorum ramosæ partes sibi implexæ, varias figuras referunt, & motibus in diversa trahuntur, pro corporibus viventibus, lapsu facili, illas habemus. Non rarò sanguinis paulò crassiores particulæ, à renum vasis ad ureteres delati, & coagulati, vermiculos imitantur, à tubulis acceptâ formâ. Ut quid partes seminis in canalibus tenuissimis lento gradu properantis & inspissati, sub vermiculorum specie non possent oculis illudere? Esto ut lubet, sint vermes. Sed non sapit illorum systema sanam Philosophiam. In unâ seminis guttulâ continetur hominum multitudo, quæ toti Europæ incolendæ sufficeret; sed omnium jacturâ & interitu, unus tantum vitâ fruitur. Si summè sapiens erat conditor naturæ, cur tot vias inutiles excogitavit ut ad unum finem perveniret? Si summè potens, quid naturam sibi non habuit obsequentem, ut illi decretis temporibus certò in lucem emitterentur homines, quos victuros præviderat? Scatent vermiculis, teste ipso Leuwenhoekio, humana excrementa, illos etiam in purissimis liquoribus corporis natate microscopiis non rarò exploratum est. An non fatebimur eos quoque esse homines? Circuitionis sanguinis legibus, à testiculis ad totum corpus sanè essent deferendi. Ut quid in loculis, putà cerebri, aliquandò non nidulantur, ubi temperatum calorem & spiritus nacti, adolescant, ut olim in femore Jovis Bacchus, & in cerebro ejus Minerva? Non omnis quidem fert, omnia tellus. Uterus est ager humanæ naturæ. Sed quid sit, ut ex myriade vermium, unicus in illo, rarò duo vel tres capiant incrementum? Locus quo continentur immetus est, quia maximè sunt exiles. Possent saltem ad certam magnitudinem, è tanto numero, crescere longè plures, quam vulgò solet. Fabula de muliere, quæ 365. foetus uno partu enixa est, jamdiù numerosis foetibus fuisset comprobata. Rationem esse mathematicam, non à liquoribus, sed à partibus solidis repetendam, quilibet sanus judicabit, quâ sit, ut extrâ solitum numerum foetus non gignantur, in singulis

animalium speciebus, nec mulieres, quarum uterus amplior est, plures eodem partu, quam pusillæ mulierculæ, edant infantes. Natos procreandis hominibus non fuisse vermes suscipari potuisset perspicax autor, qui nullis sibi visos fuisse vasis instructos fatetur, quibus cum utero jungantur, atque in ipsum radices agant. A singulis androgynis animalibus, ut cochleis terrestribus, pauca, sed grandia ova excluduntur, hîc tamen concubitus æquè necessarius est, ac in sexu diviso & singulari. Cur singulos mares sua animalcula oportet commutare? Cur unumquodque sibi ingenita non fouet, quæ faciliè cum sanguine à testiculis in uterum deferrentur? Apparent eadem copiâ vermes in animalibus, quæ fœtum unum, quâ videntur in illis quæ plures emittunt, ut quid ea jactura? fœminarum perimitur fœcunditas, exsectis ovariis, an conjicere non est, totam spem futuræ prolis in illis esse positam? Tot experimentis compertum habemus ova sæpius in cornibus uteri fuisse reperta, ubi exclusa in fœtus adolevere; sed illud iter vermibus salebrosum, & omnino impervium videtur. Hospitium, inquires, ova præbent istis animalculis. Quid ex tot millibus unum benignius excipiunt, cæteris certò perituris aditum negant? Cur illud, quod ex advenâ plane indigena factum est, semper elusit aciem microscopiorum, ut nec in ovo, nec in puncto vitelli, ubi ejus ultima sedes est, unquam fuerit deprehensum? Crescit in dies, ideòque magis fieret manifestum, & oculis pateret; at magnitudo & figura vermium semper eadem se prodit. An vi divinâ, an legibus mechanices, vascula ejus diriguntur, & aprantur tubulis vitelli ut ab illis suscipiant nutritionem? Ratio cæcutit, fide opus est. Quantò satius dixeris, omnia simul in primâ rerum origine, in ovis animantia fuisse condita: plurium insectorum ova ipso tempore concubitus, jam adulta, & partui apta sunt, imò non est in quibusdam necessarius concubitus, solâ seminis aspersione fœcundantur. Ovum gallinæ subventaneum est, quod quassatum sonum edit, partibus ejus factis fluxilibus, nonquam imprægnari potest, scilicet fractâ venâ, & arteriâ, quem continent liquorum effluere permittunt, nec motibus fermentativis spirituum seminis unquam possunt in corpus compingi. Quid autem impediret, quominus

affiduâ & calidiori incubatione, vermis in ovo fluxili saltem ad aliquam magnitudinem intumesceret? Tubuli corporis ejus, spiritus errantes, tùm albuminis & vitelli, tùm gallinæ incubantis dirigerent, ut nec fluidi nutrientis penuriâ laboraret, nec abundantioris impetu necaretur. Verosimilius igitur erit, pullum sub minimâ mole contractum, nihil opus habere ad partes evoluendas & ampliandas, obeunda/que functiones, nisi ut moveantur, quos vasis suis continet liquores. Ovi cicatrix, ubi prima concluduntur fœtus rudimenta, sita est inter vitellum & albumen. Super vitrum extensa, prima stammina animalis quodammodò in eâ distinguuntur.

V.

MICROSCOPIO vermes in semineprehenduntur. Ergo sunt homines, egregia verò cohærentia! Aptius dicas, si existunt, esse sui generis animalcula, quemadmodum & diversæ vermium species intestinorum. In liquoribus ex variis partibus compositis, & stagnantibus, facillimè plurius insectorum ova excluduntur, intestino motu fermentationis. vasa seminaria, ex quibus constantur viriles testiculi, sibi juncta, quadraginta ulnarum longitudinem facillè excedunt. semen in spiras contorta lentius subit. feriat ibi diutius, vermes per otium frequentius evolvuntur, quam in cæteris liquoribus, qui concitatiore motu feruntur. Quidni ex corruptis istis animalculis, ille gravis odor exhalaret, quem spirant, qui veneri intemperantiùs indulgent, aut sunt ætatis jam illi maturæ? *Pastillos Rufillus olet, Gorgonius hircum.* Non quidem sic malè olent infantes. Fortè non aliundè fœtorem oris feliciùs possis repetere; Rodunt enim dentium radices innumeri vermiculi, non incongruum etiam fuerit, hinc deducere furentes libidinis æstus, voluptatis animantium lenocinia, nata ex molestis vermium titillationibus, quibus ardentiùs ruunt in venerem. In senio, & gonorrhæâ virulentâ, ubi vel languida est, vel omninò extinguitur amoris dulcedo & irritamentum, pauca vel nulla animalcula in semine reperiuntur, donec fuerit restituta sanitas. Non igitur alibi, quàm in ovo sive adulto sive pullulante initium vivendi quæsieris. Ante concubitum, aut seminis asperfusionem cor tardissimè pulsât. Stimulatur, & vehementer urgetur à fracido, & urente

maris semine, soluto, libidinis ardore, in auram subtilem. Illo turgidæ vesiculæ sive ova testiculorum fœmellarum, rubescunt. Circa exclusionis tempora papilla pertusa in ovarii membranâ, aliquantulum prominet. foramen ejus varium est pro animalis magnitudine. Stylum in vaccis, in cuniculis feram tantum admittit. Nulla ejus, alio tempore, vestigia conspexeris. Per illud in tubas, hinc in uterum ova tumida delabuntur. Nec officit angustia tubarum, ipsarumque libera in abdomine mulieris fluctuatio, quæ longè major est in volucribus, in quibus ova constat à tubis suscipi, & fibrarum motricum ope in uterum detrudi, nullis tamen illæ nexibus, ovariiis adherent, at unâ aut alterâ laciniâ in muliere connectuntur. Laciniis, congressus tempore, aut saltem aliquot ab ovi fœcundatione diebus, testiculos intimè complectuntur. Si tunc temporis ulcere, aut inflammatione afficiantur, illis continuæ, & præter naturam connexæ, in sectis cadaveribus aliquandò deprehensæ sunt. Hinc anno 1691. fœtus testiculis adhærens Parisiis repertus est, in quo, nudis oculis, dentes, crines, & oculorum alter, apertè se offerebant. hinc in abdomine & tubis non rarò absoluti fœtus occurrunt. Hinc molarum origo commodè deducitur.

Non ergò homo à Vermibus.

Domini Doctores disputaturi.

<i>M. Joannes Depiney Peshard, Prasfes.</i>	<i>M. Joannes-Baptista Doudart.</i>	<i>M. Joannes-Baptista Doye.</i>
<i>M. Philippus Fontaine.</i>	<i>M. Philippus Douté.</i>	<i>M. Urbanus Leaulié.</i>
<i>M. Antonius Pepin.</i>	<i>M. Amandus Douté.</i>	<i>M. Michæul Pichonnas.</i>

Proponebat Parisiis SALVATOR CLUSCARD,
Albienfis, Baccalaureus Medicus. A. R. S. H. 1705.

Apud Viduam Francisci Muguet, Regis & Facultatis Medicinæ Typog.